

實

賓

錄

一

二

三

四

詳校官中書_臣李彤

侍讀_臣孫球覆勘

膳錄監生臣陳 祁

膳錄貢生臣王兆泰

欽定四庫全書

實賓錄卷六

宋馬永易

撰

神父

二則

漢鮑德修志節有名稱累官為南陽太守時歲多荒災
唯南陽豐穰吏人悅愛號曰神父

漢宋登少傅歐陽尚書教授數千人為汝陰令政為明
能號稱神父

陳弇為蘄長時一州旱蝗弇請雨即大降蝗即出境一

縣遍熟號曰神父

慈父

二則

後魏宗室孚為冀州刺史勸課農桑境內稱為慈父
李哲任相州安陽縣令政術有方百姓號稱慈父

賈父

二則

後漢賈琮為交趾太守叛民蕩定百姓以安巷路為歌
曰賈父來晚使我先反今見清平吏不敢飯

後漢賈彪為新息長小民困貧多不養子彪嚴為其制

與殺人同罪數年間養子者十數僉曰賈父所生長男
名為賈子生女名為賈女

杜父

晉杜預守荊州修召信臣遺跡激用潢涇諸水以浸原
田萬餘頃分疆刊石使有定分公私同利衆庶賴之號
曰杜父

柳父

柳鎮少樂閒靜不慕榮貴天監中自司州遊上元愛其

風景于鐘山之西買地結茅開泉種植隱操如耕父其
左右居民皆呼為柳父

巢父

巢父堯時隱人嘗山居不營世利年老以樹為巢而寢
其上故時人號為巢父晉王康倨招隱詩曰昔在太平
時亦有巢居子或言即許由也

家公 家父

顏之推家訓云昔侯霸之子孫稱其祖父曰家公陳思

王稱其父曰家父母為家母潘尼稱其祖曰家祖古人之所行今人之所笑也今南北風俗言其祖及二親無云家者田里猥人方有此言之推北齊人逮今幾七百年稱家祖者復紛紛皆是名家望族亦所不免家父之年稱俗輩亦多有之但家公家母之名少耳山簡謂年幾三十不為家公所知蓋指其父非祖也

賀兄

唐陸象先賀知章族姑子也象先嘗謂人曰賀兄言論

調態可謂風流之士吾與子弟離濶都不思人一日不見賀兄則鄙恠生矣

二兄

則二

唐高力士事玄宗最親寵肅宗在東宮以兄事力士呼為二兄

唐段成式與張希復善繼鄭符復夢遊精舍共徵高力

士事力士呼二兄

柯

呼阿翁

繼

呼將軍

柯

寧哥

唐寧王憲睿宗長子睿宗將建東宮以憲嫡長而玄宗時為楚王有大功故久不定憲固辭乃立楚王為皇太子玄宗友悌古無有者至呼憲為寧哥云

邠哥

唐邠王守禮章懷太子之子也每與諸王內讌方積陰累日守禮知其欲晴憊陽涉旬守禮曰即雨果連雨岐王等奏之曰邠哥有術守禮曰臣無術也則天時以章懷遷謫臣幽閉宮中十餘年每歲被勅杖數頓癡痕甚

厚欲雨臣背上即沉悶欲晴則輕健臣以此知之非有術也涕泗沾襟玄宗亦憫然

奇兒

後唐莊宗克用長子也初克用破孟方立於邢州還軍上黨置酒三垂崗伶人奏百年歌至於衰老之際聲甚悲坐上皆悽愴克用慨然捋鬚指而笑曰吾行老矣此奇兒也後二十年其能代我戰于此乎莊宗年十一從克用破王行瑜遣獻捷于京師昭宗異其狀貌賜以鶚

鵝卮翡翠盤而撫其背曰兒有奇表無忘予家克用卒
梁夾城兵聞晉有大喪因頗懈莊宗欲乘怠擊之乃出
兵趨上黨行至三垂崗嘆曰此先王置酒處集攻夾城
破之梁軍大敗凱旋告廟

祿兒

唐明皇每座及宴會必令安祿山坐於御側以金鷄障
隔之太真又以為子上亦呼為祿兒

癡兒

五代馬嗣孫為相不通世務時右散騎常侍孔昭序建言常侍班當在僕射前嗣孫責御史臺檢到臺言故事無所見據今南北班位常侍在前嗣孫即判狀施行崔居檢揚言於朝孔昭序解語是朝廷無解語人也且僕射司長百僚中丞大夫就班修敬而常侍在南宮六卿下沉僕射乎昭序癡兒豈識事體朝士聞居檢言流議稍息

買聲兒

後魏李謚神士賦歌曰周孔重儒教莊老貴無為二途
雖如異一是買聲兒

乳臭兒

則二

吳越杜建徽位宰相其孫昭達為內都監使盛治第宅
建徽曰乳臭兒不諳事其能久乎後昭達果以罪誅

唐莊宗命魏王繼岌伐蜀滅之以孟知祥節度西川莊
宗館知祥於宮中酒酣謂知祥曰吾輩老矣繼岌乳臭
兒今年伐父破賊慰喜外復增悲爾

小兒王

陳釋智凱江表揚都人年幼童外雅重嘲謔引羣小兒數百人同戲街衢以為自得陳氏臺省門無衛禁凱乃率其戲侶在太極殿前號令而過朝宰江總等顧其約束銓叙駐步迎之相視笑曰此小兒王也

聖童

傅長通年十七禮易貫洞三十萬言兼通春秋鄉里號曰聖童

神童

五則

魏胡康年十五以異才見送又陳損益求試劇縣詔特

引見衆論翕然號為神童

原註劉劭傳裴松之云魏朝不聞有胡康疑是孟康

魏任嘏幼以至性見稱年十四始學疑不再問三年中

誦五經皆究其義兼包羣言無不總覽於是學者號之

神童

原註海錄碎事魏任嘏先世皆早成人時語曰蔣氏翁任氏童

晉杜育幼便岐嶷號曰神童

原註文士傳杜育童孺奇才博學能著文章心解性

達無所不綜一時稱為武陽杜孔子